

# 2020 Brambrüeler

Schlosch öpert z'tot, kusch nümm in Knascht das isch verbi  
Suasch aifach bsoffa si, dän gits a Therapie  
Us Vorsicht kriag i jetz – i finda das vermessa  
Bi dr Schwiegermuater kai meh Wy zum Essa

Letscht Johr sind viel Prominenti vo üs ganga  
An as paarna bini ehrlichgsait scho khanga  
Au dr Lagerfeld isch jetz im Himmel laider  
Und näht vielleicht dr Uriella rechte Klaid

Sie bauen Autos ohne Lenker jetz bi Google  
Do frog i mi jo scho, wem zaigsch denn jetz dr Vogel  
Doch irgendwie isch dia Idee halt au no schlau  
Besser niamard isch am Stürrad als a Frau

Ma spendet aifach swo an Baum as isch banal  
Jo denn flügt ma schinbar CO2 neutral  
I han grad zwai so Bäumli gspendet - s'tuat sich lohna  
Und kann as halbs Johr gratis furza noch da Bohna

Mini Frau behauptet stiif i gängi fremd  
Sie schmöcki fremdi Parfümdüft an minem Hemd  
Liaba Schatz säg i - jetz sig nid so besessa  
Han nur bim Läderach a Schoggi gholt und gässa

Ob Sabina Irma oder Tatjana  
Orkän und Stürm händ praktisch immer Frauana  
Daas kann kai Zuafall si behaupten miar do keck  
As foht mit blösa a – am Schluss isch z'Huus aweg

Alli freuen sich ufz neua Kino Wescht  
Nur am Räber git das schinbar fasch dr Räscht  
Bald scho kriagsch bi ihm für 25 Stai  
A ganza Kinosaal nur für di allai

Wäg dem Virus schöpfens weltwit usam volla  
Quarantäne Fiabermessa Flugkontrolla  
Nur in Züri bliebens ruhig jo döta rollts  
Sie sind nid gfährdet - au an Virus hät sin Stolz

Wenn as Bett kaufsch bir IKEA krampfsch di z'tot  
Fohsch öpa 5x neu a bis das endlich stoht  
Und machsch denn Zügissex döt dri mit diner Tuba  
fehlt dem Goof denn garantiert aswo a Schruba

Fürz Betruga kriagsch vom Priaschter will er muass  
Drei Vaterunser und zwai Rosakränz als Buass  
Und für Oralverkehr kriagt an Ministrant  
A Tafla Schoggi und a Batzali in d'Hand

In Khur do gits a ganza psundra Schlag vu Lüt  
Kriagen Khohla, schlofen us und schaffend nüt  
Nai, nai für eimol sigend miar nid vu Beamta  
dermol gohts um üsi arma Asylanta

In Friburg stöhnts am Morga bim Apell  
An junga Ministrant wird gsuacht - wo isch dä Gsell  
Do Lupft dr Domherr lächelnd sini Hand  
Dä tuat grad Kerza löscha, unter minem Gwand

Egal was für a Werbig lauft, d'Wendi dia macht mit  
Nur z overscht ufam Podescht jo do gsehsch sie nid  
I glaub sie hät kai Rückgrad meh, sie isch a biz a Nocka  
Denn mitma Rückgrad khönnt ma nid so blöd im Kühlschrank hocka